

采芳隨筆卷六

北平查 彬伯埜輯

杏花豔品也東方歲星之精一名甜梅二月開五出千葉者不實六出者雙仁有毒黃花者絕品有蓬萊杏文杏縹杏仙人杏等名其實則有金杏白杏沙杏梅杏柰杏金剛拳木杏山杏巴旦杏赤杏黃杏紫杏海杏等目裴晉公午橋文杏百株名曰碎錦坊揚州太平園有爭春館三柳軒雜識以為有閨門之態花經杏四品六命唐溫巨卿憲詩云圍雪止晴梢江明映碧窰店香風起夜村白雨休朝靜落頻沾帶繁開正蔽條澹然閒賞玩無

以破妖韶樂天杏花下贈劉郎中云恠君把酒偏惆悵
曾是貞元花下人自別花來多少事東風二十四回春
又杏園花落云花園欲去去應遲正是風吹狼籍時近
西數樹猶堪惜半落春風半在枝李義山詩云上國昔
相值亭亭如欲言異鄉今暫賞脉脉豈無恩援少風多
力牆高月有痕為含無限意遂對不勝繁仙子玉京路
主人金谷園幾時辭碧落誰伴過黃昏鏡拂鉛華膩爐
藏桂燼溫終應催竹葉先擬咏桃根莫學啼成血從教
夢寄魂吳王採香徑失路入烟村吳子華融途中見杏
花詩云一枝紅杏出牆頭牆外人行正獨愁長得看來

猶有恨可堪逢處更難留林空色曙鷺先到春淺香寒
蝶未遊更憶帝鄉千萬樹淡烟籠日暗神州又詩云粉
薄紅輕揜歛羞花中占斷得風流軟非因醉都無力凝
不成歌亦自愁獨照影時臨水畔寢含情處出牆頭徘徊
盡日難成別更待黃昏對酒樓溫飛卿詩云紅花初
綻雪花繁重疊高低滿小園正見盛時猶悵望豈堪開
處已續翻情為世累詩千首醉是吾鄉酒一樽杳杳豔
歌春日午出牆何處隔朱門鄭守愚谷詩云不學梅欺
雪輕紅照碧池小桃新謝後雙燕却來時香屬登龍客
煙籠宿蝶枝臨軒須貌取風雨易離披又曲江紅杏云

遮莫江頭柳色遮日濃鶯睡一枝斜女郎折得殷勤看
道是春風及第花羅昭諫隱詩云暖氣潛催次第春梅
花已謝杏花新半開半落閨園裏何異榮枯世上人又
詩云暖觸衣襟漠漠香間梅遮柳不勝芳數枝豔拂文
君酒半里紅歎宋玉牆盡日無人疑悵望有時經雨乍
淒涼舊山山下還如此回首東風一斷腸司空表聖村
西杏花云薄膩力偏羸看看愴別時東風狂不惜西子
病難醫肌細分紅脉香濃破紫苞無因留得翫爭忍折
來拋又詩云詩家偏為此傷情品韻由来莫與爭解笑
亦因兼解語只應慵語倩鶯聲薛長史能詩云活色生

香第一流手中移得近青樓誰知豔性終相負亂向春
風笑不休宋王元之禹偁杏花六首云紅芳紫萼怯春
寒蓓蕾粘枝密作團記得觀燈鳳樓上百條銀燭淚闌
干暖映垂楊曲檻邊一堆紅雪罩春烟春来自得風流
伴榆英休誇買笑錢桃紅李白欲爭春素態嬌姿兩未
勻日暮牆頭試回首不施朱粉是東鄰長愁風雨暗離
披醉繞隄看得幾時只有流鶯偏趁意夜來偷宿最繁
枝登龍曾入少年場錫宴瓊林醉御觴爭戴滿頭紅爛
漫至今猶雜桂枝香陌上紛披枝上稀多情猶解撲人
衣雙成灑道迎王母十里濛濛絳雪飛林和靖詩云蓓

蕾枝梢血點乾粉紅腮頰露春寒不禁煙雨輕欺著祇
好亭臺愛惜看偎柳傍桃斜欲墜等鶯欺蝶猛成團京
城巷陌新晴後買得風流更一般韓魏公次韻和崔公
孺黃杏花云顆顆裝成藥竈牙日邊開處近彤霞真宜
相閣栽培物更是仙人種植花高行出羣猶仰慕香名
迢格合洪誇諸賢繼有尋芳會欲奉歡遊決自差邵康
節灋河上觀杏花迴云灋河東看杏花開花外天津暮
却迴更把杏花頭上插途人知道看花來王半山詩云
垂楊一徑紫苔封人語蕭蕭院落中獨有杏花如喚客
倚牆斜日數枝紅又詩云只愁風雨劫春回怕見枝頭

爛漫開野鳥不知人意緒
啄教零亂點蒼苔
心憐紅蕊與移栽
不惜年年糞壤培
風雨無時誰會得
欲教零亂強催開
看時高豔先驚眼
折處幽香易滿懷
野女強簪看亦醜
少教憔悴逐荆釵
東坡月夜飲酒杏花下詩云
杏花飛簾散餘春
明月入戶尋幽人
褰衣步月踏花影
炯如流水涵青蘋
花間置酒清香發
爭挽長條落香雪
山城薄酒不堪飲
勸君且吸盃中月
洞簫聲斷月明中
惟憂月落酒杯空
明朝卷地東風惡
但見綠葉棲殘紅
又徐熙杏花云
江左風流王謝家
盡攜書畫到天涯
却因梅雨丹青暗
洗出徐熙落墨花
徐仲車詩云
窗外花

開紅滿枝董生正下讀書帷東風到晚殊無定今夜清
香屬阿誰一點胭脂淡染腮十分顏色為誰開殘燈欲
燼書帷閉猶有清香半夜來呂東萊祖謙詩云江梅已
過杏花初尚怯春寒著蕊疎待得重來幾枝在半隨蝶
翅半蜂鬚范石湖題張晞顏杏花圖云紅粉團枝一萬
重當年獨自費東風若為報答春無賴付與笙歌鼎沸
中又雲露堂前杏花云蠟紅枝上粉紅雲日麗烟濃看
不真浩蕩光風無畔岸如何鎖得杏園春陳簡齋句云
客子光陰詩卷裏杏花消息雨聲中放翁詩云我行浣
花村紅杏紅于染數樹照南陂一林藏北崦雖慙嶺梅

高繁麗豈易貶雨絲飛復止雲葉低未歛似嫌風日緊
護此臙脂點身閒得縱觀無語吾所歎又句云小樓一
夜聽春雨深巷明朝賣杏花楊誠齋郡圃杏花云小樹
嫣然一兩枝晴薰雨醉寂相宜纔憐欲白仍紅處政是
微開半吐時得幸東風無忌對主張春色更還誰海棠
穠麗梅花淡匹似渠儂別樣奇迴出千花合受降不然
受拜亦何妨行穿小樹尋晴朶自挽芳條嗅暖香却恨
來時差已晚不如清曉看新粧朗吟清露溫風句惱殺
詩翁只斷腸又詩云道白非真白言紅不若紅請君紅
白外別眼看天工又詩云白白紅紅一樹春晴光耀眼

看難真無端昨夜蕭蕭雨細錦全機却作茵紅藍細細
繆晴苞紫玉森森走膩條枯梗折枝無一寸併驅春色
犇花梢不信東皇也有私如何偏寵杏花枝于中更出
紅千葉且道化工奇不奇曾見乾條撼雪飛一暄爆出
萬餘枝送今日日須来看看到紅紅白白時看花千樹
洛陽春白傳年年愛趙村月蕊晴葩風露格老夫移得
在東園葉靖逸句云春色滿園闌不住一枝紅杏出牆
來戴石屏句云一冬天氣如春暖昨日街頭賣杏花鄭
安晚句云客裏不知春早晚失驚紅雨到牆陰金毛麀
詩云碎翦明霞後化工曉園香散暖烟中羞逢柳眼三

眠白分得桃腮一笑紅上苑繁華迷故國曲江顚顚老
春風欲傳此恨花無語強對芳時作醉翁元遺山詩云
芳樹春融絳蠟凝春風寂寞掩柴荆畫眉盧女嬌無奈
齟齬孫娘笑不成已怕宿粧添蝶粉更堪暖蕊鬪蜂聲
一般踈影黃昏月獨愛寒梅恐未平一穗蘆鞭一穗塵
西園紅豔眼中新帽簷分去家家喜酒面飛來片片春
梅柳幾曾同故事櫻桃纔得綴芳辰荒城此日腸堪斷
老却探花筵上人又杏花雜詩三首云杏花牆外一枝
橫半面宮粧出曉晴看盡春風不回首寶兒元自太憨
生露華浥浥汎晴光睡足東風倚綠窓試遣紅粧映銀

燭湘桃爭合伴仙郎紅粧翠蓋惜風流春動香生不自
由莫向芸齋厭閒冷小詩供作錦纏頭又杏花落後云
懶髓能醫病頰肥鸞膠無那片紅飛殘陽澹澹不肯下
流水溶溶何處歸煮酒青林寒食過明粧高燭賞心違
寫生正有徐熙在漢苑招魂果是非紀子正杏園宴集
云紀翁種杏城西垠千株萬株紅豔新今年寒食好天
色曉風鬱鬱含芳津天工自愛此花好朝薰暮染煩花
神融霞暈雪一傾倒非烟非霧非卿雲未開何所似乳
兒粉粧深絳唇能啼能笑癡復騃畫出百子原非真半
開何所似里中處女東家鄰陽和入骨春思動欲語不

語時輕顰就中爛漫尤更好五家合隊號與秦曲江江
頭省車馬十里羅綺爭紅塵陽平一邑多詩豪主人買
酒邀衆賓花時有成約恨少楊子張吾軍落花著衣紅
繽紛四座慘淡傷精魂花開花落十日耳對花不飲花
應嗔愛花常苦得花晚爭教行樂無閒身芳苞一破不
更合且看錦樹烘殘春元錢思復惟善詩云等鶯期燕
引遊蜂知隔垂楊第幾重壇近緇帷忘晝永宮催羯鼓
助春濃絳烟輕潤香鬚浥紅雪乾團粉淚鎔寂寞曲江
人不見貞元朝士憶時雍宋子虛元牆頭杏花云紅杏
西鄰樹過牆無數花相煩問春色端的屬誰家元桐源

淮詩云臘脂萬點怯輕寒蓓蕾枝頭絳雪乾昨夜南園
春雨過玉人曉起揭簾看張伯雨墨杏花折枝云折得
鄰牆紅杏枝春風偷染墨臘脂恰如誤入仙山路虎嘯
林深月暗時鄭氏允端徐熙杏花云寫生政自愛徐熙
把卷摩挲眼欲迷曾記沉沉春雨後一枝斜透粉牆西
明楊孟載基詩云當時庭館醉春風客裏相逢意轉濃
只恐胭脂吹漸白最憐春水照能紅一枝爭買珠簾外
千樹遙看小店中惆悵先生歸去後江南烟雨又濛濛
吳匏庵清明日杏花初開云疎花寐歷似殘紅病眼摩
挲望欲空已恨浥開無細雨却愁吹落有狂風物華又

報清明節人世真成白髮翁為語天工須索性剩將春
色慰人濃朱蔗亭謀晉詩云二月燒林發絳英六街初
有賣花聲黃鸝立亞高枝兩紫燕飛來小樹晴村僻深
藏沽酒旆樓高全露約簾旌年年開徧曲江寺香在馬
蹏歸處生陳振之鐸自題寫杏花云晴園紅粉護春烟
髣髴江村二月天記得景卿回首處一枝斜拂酒樓前
申瑤泉杏花垣詩云坊開裴墅錦花發董林株望欲迷瓊
苑栽疑近白榆微風舒露臉小雨溼烟鬚春意枝頭鬧
送教醉玉壺又題扇頭杏花云上林佳處午橋邊半染
頰霞半著烟記得曲江春日裏一枝曾占百花先陸濬

源深曲江春杏圖云壯地春偏早長安二月中杏花凡
幾樹金水玉河東綠羅衣袂寒猶重九陌香多漾軟紅
何用內園催羯鼓一枝驚破喝聲雄徐長文題杏花云
朶朶西施靨年年牆外窺莫嫌粧不澹帶酒未醒時枝
枝出牆語朶朶向人窺宋玉鄰家女施朱太赤時文休
臣嘉詩云三月曲江微雨乾東風一日徧長安圍煙簇
粉春如海總待新郎馬上看葛慎之孔明題杏花小景
云春風開到上林枝一段韶光二月時恰似玉人臨曉
鏡鬢邊淺淺注胭脂近時高念東清明過窰頭水曲杏
花未開詩云杏花寒食燕呢喃臨水行人勒馬銜記得